

荀氏尚論篇序

上古之世未有儒也所謂通天地人者巫
與醫而已巫咸始爲巫號爲神巫其事守
逮夏商未改顓頊命南正重爲司天以屬
神北正黎爲司地以屬民絕地天通亦神
巫之屬也洪荒以後彷彿劫初成時光音
天來下化生世界地天未隔民神不分故
自少皞至黃帝得命官以司之屬之重不

上天安能司天、黎不下地、安能司地、顧溺
習見聞、以爲宗伯司徒之官、而上天下地、
後人之所以寵神其祖、夏蟲語冰、曷足怪
乎、神農嘗百草、黃帝作內經、伊摯製湯液、
天子宰相皆醫師也、皆醫官也、以黃帝之
聰明、狗齊稱歧伯爲天師、其所論難、窮極
天地、分列陰陽、儒者雅言三墳之書、言大
道者、唯醫經在焉、豈非窮神知化、通天地

人之極致乎自周公以司巫醫師分屬六
官而巫醫之任漸輕自孔子以魯國之儒
統承斯文而巫醫之道漸隱其降而爲方
技不得與儒齒則自范曄始也東漢之末
巫術熄而道教立天師之劍印遂與竺墳
魯誥鼎列爲三要其冥通玄感驅風雷斥
神鬼不過古者神巫之能事巫之名悶於
道而其教跡則託於道而益尊若漢以後

序
之醫則不能自立壇墀而咸寄跡於儒儒
者窮研經術深談性命俎豆於賢人之間
而醫不出方技之列若近代之劉張李朱
本朝之戴元禮滑撓寧王仲光皆真修壹
行方聞經國之大儒曾不得攝齊扱衽廁
跡儒林道學之間醫之託於儒不若巫之
託於道也蓋已久矣吾晚而得見嘉言喻
先生其爲人則盧照隣之贊孫思邈所謂

道洽古今學通術數高談正一則古之蒙
莊子深入不二則今之維摩詰也著尚論
篇發揮仲景之精微補正叔和之遺闕叅
以妙悟得之神解甲乙千金之書未能或
之先也吾觀其論大青龍湯一章以其雷
雨滿盈飛騰蕩滌之神用縮而爲小青龍
則龍首藏於蚕蠟馴而爲越婢一則龍身
化爲絲絃白虎以成其對待真武以鎮其

汎佚通天之手眼馭龍之心法旁見側出
孤映絕照千載上下豈非有神者告之隆
墀永歎遠壑必盈取喻於晉重耳越勾踐
之反國折肱知醫論蠱喻政思深哉古之
上醫也嗟夫不通天地人不可以言儒不
通天地人不可以言醫昔人有言以至精
至微之道傳之以至下至淺之人儒以學
術殺天下醫以經方殺天下民用天扎物

用疵癘鬼神不享祀而風火刀兵之劫繼
作豈細故哉吾嘗搜緝國史以周玄真張
鐵冠之流爲高道以原禮櫻寧之流爲儒
醫於禪之冒儒者解其駁而歸禪於儒之
冒儒者訂其實而歸僞排纘甫就劫火及
之知天之不欲使與史事也遂釋然志其
所有事讀嘉言之書於吾心有戚戚焉不
揆愚誕率意而敘之如此世之君子得其

書者當深思而自得之無以爲親見揚子
雲言貌不能動人而笑吾言之無當也先
生姓喻氏名昌南昌之新建人嘉言其字
也重光單閼之歲相月二十八日

十七六

尚論篇自序

混茫初開聖神首出民用未興藥草先備
醫道之關性命爲何如哉軒轅帝尊其臣
岐伯爲天師每聞典要必載拜敬受金匱
玉函珍藏其文由茲神工繼起倉扁而下
代有傳人或發揮方書或抽揚脈理非不
燦然天地間然能神悟於靈蘭之先獨探
夫鴻濛之秘從無文之文解畫前之卦使

讀者因象得義因義得神冥入無垠顯傳
衣帶則曠世以來未易覲也輓世道降術
升醫事之不振久矣昌一人卽身爲標言
爲的而獨吹無和少見多恠此理一晦黑
若夜行心竊憂之於是杜門樂饑取古人
書而尚論之然而泛涉則管窺蠡測終身
莫殫攬要則玄珠妙諦罔象可求不知古
人與我俱範圍於道者也同于穆然無朕

中而剖抉性命之微古人所言皆我固有
觀天之道觀我之生機非相貸古人既往
有我負荷韞藏待剖棼絲待理責難他諉
昔阿難問世尊曰古佛以何人爲師世尊
答曰以吾爲師此卽誕生所指天上天下
惟吾獨尊之旨可見吾之分量天地古今
莫得而囿但非昌之所敢舉揚者也昌意
中祇求精神呼吸實與古人潛通一脈若

咸迪於愚衷稟承於覲面凡有闡述一如
 陽燧方諸之得水火天然感召泯絕思議
 於以快吾尚論之本懷耳雖然高明之弊
 說經創解其事多僭固陋之弊牽文襲義
 其事多竊惟僭與竊一念好名終古貽害
 覆轍相尋可無懼乎昌不揣嘗慨仲景傷
 寒論一書天苞地苻爲衆法之宗羣方之
 祖襍以後人知見反爲塵飯土羹莫適於

萬分之一分閱百年再世寢失其傳後人
莫由仰遡淵源然且競相彼揣此摩各呈
識大識小之量亦性光所攝無窮極之一
斑矣我佛如來累劫中爲大醫王因病立
方隨機施藥普度衆生最後一生重補其
充足圓滿之性量八萬四千法門門門朗
澈底裏諸有情微逗隙光者咸得隨機一
門深入成其佛道與過去未來現在盡虛

空法界無量億諸佛諸菩薩光光相盪於
諸佛諸菩薩本願本行經呪偈言歷劫宣
揚不盡者光中莫不彰示微妙具足滅度
後阿難尊者証其無學與我佛如來知見
無二無別乃得結集三藏十二部經典永
作人天眼目濟度津梁夫諸佛菩薩真實
了義從如來金口所宣如來口宣又從阿
難手集昌苟性地光明流之筆墨足以昭

示學何也不自澈鬚眉藏府中陰優游凡
席克滿烜天赫地耀古輝今之量直與黃
岐仲景兩光攝合宣揚妙義頃刻無欠無
餘乃日弄精靈向棘栗蓬中葛藤窠裏與
昔賢校短論長爲五十步百步之走路頭
差別莫此爲甚發刻之稿凡十易已刻之
板凡四更唯恐以凡人知見雜揉聖神知
見敗絮補葺美錦然終不能免也甚於風

寒暑濕燥火六氣及雜証多門殫一生力
補之不能盡補卽殫千生力補之不能盡
補從可推也途窮思返斬絕意識直截皈
禪通身汗下險矣險矣尚敢漫言殊途同
歸也哉此重公案俟可補乃補之耳
順治十五年上元吉旦西昌喻昌嘉言老
人時年七十有四序